

蜀

水

經

蜀水經卷之十一

京山李

沱江

沱江首受江自灌縣城南別都江而東

禹貢曰岷山導江東別爲沱爾雅曰江出爲沱孔安國曰江東流沱南行漢書曰蜀郡郫縣禹貢江沱在西東入大江括地志曰新繁縣有繁江首受郫江卽禹貢江沱也是沱江有郫江繁江之稱矣林三山曰自江水溢出別爲支派者皆名爲沱故梁荆二州皆

有沱南郡枝江縣江沱在西此荆州之沱也蜀郡郫縣江沱在西此梁州之沱也東別爲沱接于岷山導江之下則自江水始出而別流者也意其指梁州之沱也詩地理考曰南郡枝江縣有沱水其流入江而非出于江也書纂言曰成都縣南七里有沱江鎮以沱水名卽東別爲沱也愚按沱江江之支流也漢書謂瀟水出玉壘山東南至江陽入江郭璞謂玉壘作東別之標水經注謂瀟水出綿道亦曰綿虜之玉壘山又東別爲沱是皆以沱江爲瀟下流而非江支流

矣岷澗合流已遠安見東別者之必爲澗水哉禹貢  
係江不係澗也又按舊說荊州之沱有二一謂在枝  
江則百里洲也縣東北六十里有洲寬廣百餘里洲  
首孤別南爲外江北爲內江嘉靖初江水衝斷其中  
洲分上下一謂在夔州則清水也清水一名夷水自  
施南開蠻界水東逕巴東長陽宜都入江不源江水  
或謂故道湮塞然大山阻隔恐亦未有故道禹貢江  
沱斷以梁州爲是

沱江又東經太平橋分支東爲沙子河又分支東南爲

泊木河二河注於羊子河

沱江又東北經廻龍橋北受毛溝洞水

毛溝洞自城內東隅穿城而出卽三泊洞之支流唐書曰導江有侍郎堰龍朔中築有小堰長安初築

沱江又分支東經崇寧縣城北注於羊子河

崇寧縣故彭縣地也唐儀鳳二年分置唐昌縣屬益州垂拱二年改屬彭州長壽二年改周昌神龍元年復爲唐昌梁開平二年改歸化縣後唐復故晉改彭山縣漢復七年省入郫縣宋置永昌縣崇寧元年改

崇寧縣

沱江又北受馬桑河馬桑河源出岷江自灌縣城南三泊洞穿城而出分爲蒲陽河又東北合流入沱

三泊洞河自人字堤穿城北注與蒲陽河會於莫家沱者爲觀音河自北折經崇彭漢州會綿維諸水又有北條河自太平橋下與蒲陽河分派經崇輞分爲沙子河馬鞍河達於成都之北宋史曰新石洞口溉導江崇寧九隴濛陽達於漢州之洛是爲瀟水

沱江又東北爲渡船河受南溪南溪源出龍潭溝東受

茅草溪又東受土溪又東經兩河口入沱

沱江又東受濛陽水濛陽水源出彭縣西北琅岐山東南經三郎鎮分支東經慈母山入石亭水又南分三支一爲乾河一爲新開河一爲馬木河俱散流入沱

唐書曰武后時長史劉易從決唐昌之沱江鑿川派流合坳口琅岐水以溉九隴唐昌之田民爲立祠寰宇記曰瀾濛水源出琅岐山經濛陽故縣南二百五十步通志曰玉村河源出五峯山經坳口鎮南至竹溪合白水黑水中隋乾溪大隋白鹿七河合而爲一

經彭門山下出三郎鎮後分三小支東流六十里入  
慈母山一支東流六十里入漢州其正流名馬木河  
南流十里又折東流二十五里合渡船河渡船河自  
崇寧縣流經彭縣合玉村河至住春林分一支爲鷓  
水河繞新繁縣西南又東流二十里入新都界其正  
派入新繁縣爲清白江

彭縣故繁縣地也宋元嘉十三年分置晉壽郡晉壽  
縣梁改郡縣爲東益州後周廢州改九隴郡九隴縣  
隋開皇廢郡仁壽初改置濛州大業廢州屬蜀郡唐



武德三年復置濠州貞觀二年州廢屬益州儀鳳二  
年分置濠陽縣垂拱二年分置彭州天寶改州爲濠  
陽郡乾元復故文德元年改成勝軍景福元年罷軍  
宋熙寧二年分置埭口縣四年省埭口元至元十三  
年省九隴明改州爲彭縣省濠陽入之屬成都府  
國朝康熙七年省入新繁雍正六年復置○唐彭州  
有天水唐興二府七盤安遠龍溪三城羊灌田朋竿  
繩橋三守堤城有威戎第當風戍靜塞關○九隴縣  
以山名也縣北有九隴山勝覽謂山有九隴伏隴豆

隴秋隴龍奔隴走馬隴駱駝隴千秋隴蛟車隴橫擔  
隴

沱江又東經新繁縣北爲清白江

宋趙抃過清白江曰吾心如此清白雖萬類混其中  
不少濁也名勝記曰晉太康地記江沱在繁縣蕭廣  
濟注江賦觸玉壘山東廻爲沱據漢書此江卽秦守  
李冰所鑿非禹貢之江沱明矣李冰導水見水經橫  
突乃鑿九井象九宮以厭之元末井涸

新繁縣故繁縣也漢置屬蜀郡高帝九年封張昭爲

繁侯蜀漢延熙十年涼州夷降姜維徙夷居繁而遷  
繁民居新縣後周改新繁縣隋開皇省入成都唐武  
德三年復置屬蜀郡

沱江又東分支東北流爲督橋河

沱江又東經新都縣彌牟鎮北爲彌牟水

圖經曰八陣凡三在夔者六十有四方陣法也在彌  
牟鎮者一百二十有八當頭陣法也在棋盤市者二  
百五十有六下營法也李膺益州記曰稚子關北五  
里有武侯八陣圖土城四門中起六十四魁八入爲

行魁方一丈高三尺緯畧曰在新都者峙土爲魁植以紅石四門二首六十四魁八八成行兩陣竝峙周凡四百七十二步魁百二十有八○稚子關漢王渙之墓也在縣北五里墓前有二石闕各高三丈兩角有斗重屋四壁列神像人物牛馬之類一題漢故兗州刺史雒陽令王君稚子之闕一題漢故先零侍御史河內縣令王君稚子之闕後漢書曰渙字稚子廣漢邾人舉茂才除溫令遷兗州刺史徵爲侍御史還爲洛陽令卒王僧虔技錄曰雁門太守行歌洛陽令

樂府解題曰歌詞歷述渙本末與本傳合而曰雁門太守所未詳

新都縣故蜀郡地也漢置蜀廣漢郡晉太始二年分置新都郡太康六年罷郡以縣仍屬廣漢梁置始康郡始康縣西魏廢郡隋開皇十八年改始康爲興樂大業省入城都唐武德二年復置屬蜀郡○蜀有三都成都廣都新都蜀有二雒新都爲上雒建寧中江爲下雒縣北半里寶光寺係唐僖宗行殿柱礎方圍一丈二尺圓徑二尺高一丈八寸鐫有詩銘是其故

物縣北三里麗元山平地特起回絕高三丈有雙石徑廣五尺或掘深至水未得其根

沱江又東經漢州向陽場爲武侯水

相傳諸葛孔明津濟之處後唐長興三年孟知祥敗董璋追至武侯津卽此水也又名馬蹄水亦清白江之支流

漢州故雒縣也漢置屬蜀郡改屬廣漢郡後漢爲雒州刺史治晉改屬新都郡太康六年移廣漢郡來治宋元嘉九年分置西五城郡尋廢西魏分置懷中縣

隋開皇廢郡改縣爲綿竹大業初復爲雒縣屬蜀郡  
唐垂拱二年置漢州天寶改德陽郡乾元復爲漢州  
屬建南道宋爲漢州德陽郡屬成都路元中統元年  
省雒縣入州○漢商人王岑起兵雒縣殺王莽庸部  
牧朱遵以應建安十八年先主自綿竹進兵圍雒拔  
之馬良致書於武侯曰雒城已下配業先國魄兆斯  
見先主遂圍成都魏景元四年鄧艾破諸葛瞻於綿  
竹進至雒亦蜀之門戶也唐房瑄爲刺史日鑿湖數  
百畝洲島回環亭堂臺榭極一時之勝稱房公湖高

適杜甫皆嘗遊此而賦詩焉宋熙寧中奏墾爲田而  
今廢矣宋二程子侍父珦守漢州州東講道臺是其  
遺跡愚按漢水距州五百餘里而州以漢名者因太  
康之移郡治也

沱江東會督橋水爲綉川河

沱江又東經斜灘渡與昆江會昆江由錦水河東經新  
繁縣南分支東南流爲水利河又分支東經天隰山下  
爲三河又東北爲昆橋河又東受三河水又東爲五城  
水又東受水利河又東入沱



水經注曰鄆江水東繞綿維經五城縣界至廣都北岸南入于江謂之五城水口斯爲北江

沱江又東南與綿維二水會爲中江

寰宇記曰銅盤山在縣西北二十里北接維縣南接新都山形如盤維水彌牟水毗橋水經其上下合爲中江又曰滿水在懷安軍西北從漢州彌牟維水毘橋等三水合爲一江按清白江亦名彌牟水亦名武侯水亦名馬蹄水亦名督橋河亦名綉川河亦名滿水是中江也錦水河亦名毘江亦名鄆江亦名鄆橋

河亦名五城水是前江也綿雒二水合流亦名綿水亦名雒水亦名石亭水是後江也三江俱會於焦山坡而漢書以湍爲經流水經以雒爲經流至江陽稱綿水口又以綿爲經流三源相敵互受互稱今以沱江爲經流從禹貢漢書也

沱江又東南出金堂峽

有金臺山水出金沙因名相傳東岸有金船銳底民於水中往往見之亦云鼉冷所鑿謂之金灌口宋轉運使韓琦復修之以通舟楫其東枕雲頂山山狀似

城本名石城山唐天寶六載改爲雲頂有神泉方丈許澄清如鏡雲霞常覆其上名勝記以三學山當之非也宋淳祐三年余玠城雲頂山以備外水爲州治六年蒙古將鈕璘入成都蜀帥蒲澤之令楊大淵等守劍川及靈泉山鈕璘大破之進圖雲頂山扼其歸路

金堂縣故新都牛轉地也晉義熙末置金水戍西魏置金淵郡金淵縣白牟縣後周郡及白牟俱廢以縣屬蜀郡唐武德元年改金水縣屬簡州咸亨二年分

置金堂縣屬益州垂拱二年改屬漢州晉天福初改  
金堂爲漢城尋復故宋乾德五年罷金水置懷安軍  
元改軍爲懷州至元十三年縣省入州二十年廢州  
復置縣屬成都府○縣東十里三學山一名棲賢山  
後蜀太后太妃賦詩稱漢州三學山其時縣爲州屬  
也太平廣記曰李脫居金堂山龍橋峯下當周穆王  
時丹成已八百年三於此山學道故名按李八百有  
四居三學山者名脫居簡州李八百山者名和晉抱  
朴子所稱名阿朱魏漢津所遇名良俱年八百歲

沱江又南經臨江浦爲資水

簡爲古資州以水名也沿江有九壩曰柳潭長風射  
洪普州白塔懷遠三江新市灌水

沱江又東南受盤溪盤溪源出盤龍山之普濟泉南合  
龍泉東入沱

龍泉鎮卽靈泉縣故城今設巡檢司司治南有小溪  
卽龍泉也東入盤溪鎮後爲分棟山周數百里高大  
險阻以石次第爲步

沱江又南受絳水絳水源出仁壽縣東牛角寨東受赤

水又東受海螺河又東經龍門洞又東經五龍岡又東經簡州城入沱

赤水有二其出月絳山者在州北七十里卽入絳之水也其入仁壽者在州西南四十里平泉故縣南七十步

沱江又南經簡州城東

簡州故牛鞞縣也漢置屬犍爲郡晉永和中改屬蜀郡宋改鞞縣齊復故西魏恭帝二年廢牛鞞置武康郡陽安縣婆閏縣周閔帝元年置資州武成二年移

州治資中而郡縣如故隋開皇十八年廢郡改婆閭  
爲平泉縣屬益州仁壽二年置簡州大業廢州以縣  
屬蜀郡唐武德三年復置簡州改平泉爲靈泉久視  
元年分置東陽縣天寶改州爲陽安郡改東陽爲靈  
池乾元復改郡爲簡州屬劍南道後置清化軍宋爲  
簡州陽安郡屬成都路天聖四年改靈池爲靈泉元  
至元十二年廢陽安靈泉平泉三縣入州明洪武六  
年改簡縣正德八年復爲簡州○州西一里牛鞞故  
城東二里陽安故城南九十里婆閭故城西南五十

里平泉故城西南四十里平泉故城西七十里靈泉  
故城○圖經謂簡有四巖東西南北也三溪東南前  
也三池柳鳳賴簡也東巖在城東五里巖高數丈刻  
東巖二大字有溪流於兩山之間懸涵清音可聽西  
巖在城西四里洞深三丈五尺濶如之宋嘉定甲子  
王武卿結菴於此題名其上刻西巖二字南巖在城  
一里有洞深三丈濶二丈五尺相傳唐李淳風生於  
州之乾封鎮有故宅及墓而此爲淳風洞也石刻無  
名氏詩云烟飛嵐翠撲衣裳落日牛羊下隴頭莫道



山中生意薄江邊桃李自風流北巖在治北二里洞  
溪三丈澗五尺有坐榻石竈倚開石廳廳下有泉前  
溪在陽安治後亦名後溪宋文與可有後溪晚步詩  
南溪在壽昌寺前由南溪沿隄一里許爲東溪宋學  
士文節公劉光祖墓及讀書樓在焉宋姚莘詩曰賴  
簡池臺兩蜀誇東溪別是一仙家橋池在折橋橋下  
鳳池在鳳翹山前賴簡池出賴簡山州所由名

沱江又東南經版堅山

大江南流此山橫截爲關鎖

沱江又南受桃花溪桃花溪源出樂至縣西周鼎山東受玉帶溪又東入沱

樂至縣故資中牛鞞地也後周置車免鎮建德三年置普慈郡多業縣隋廢郡開皇十三年改多業爲普慈縣屬資陽唐武德三年分置樂至縣屬資州宋乾德五年省普慈入之寶祐後省樂至入安岳明成化二年復置樂至屬潼川州正德十年改屬簡州嘉靖九年還屬潼川○縣東二里樂至池縣所由名也縣南婆娑山卽車免山縣東北三十五里普慈故城

沱江又南經資陽縣城西受資溪

資溪源出簡州山谷縈紆九曲而入雁江宋張方題  
資谿橋詩云資水右旋江會合天臺西直卦文明

資陽縣故資中縣也漢置屬犍爲郡梁廢周武成二  
年置資陽縣尋移資州來治又置資中郡隋開皇廢  
郡移州治益石唐貞觀四年分置丹山縣六年廢丹  
山明年復置宋乾德五年廢丹山入益石元省資陽  
入簡州明成化二年復置資陽屬成都府正德改屬  
簡州 國朝雍正五年改屬資州○縣解入卦井三

字係王褒筆碑目謂王子淵宅在縣西馴馬之靈仙  
觀圖經謂縣南五里書臺上豐碑二十餘片刻聖主  
得賢臣頌是王子淵讀書處有洗硯池一勺墓在縣  
西北十五里石碣高丈餘文字磨滅

沱江又東南爲雁江

曹榮諱詩曰城下江流金雁月亭中人弄玉絃琴

沱江又南受珠溪珠溪源出仁壽縣南龍回山青石舖  
東北流折而南入沱

沱江又東南經老君巖

巖上有洞水泛洞口非舟不得入無名氏詩曰老君  
仙洞懸巖入八卦喧窗面面開自是乾坤通一竅等  
閒不許俗人來明有漁人於洞中得鐵鼎其形古怪  
孝廉陳應文市而藏之一夕雷雨大作鼎飛去

沱江又東南經月山故城南

月山縣東至州五十里內江水經其城南

沱江又東南經資州城西而東而南過唐明渡

資州故資中地也周保定二年分置盤石縣隋開皇  
七年移資州來治大業改州爲資陽郡義寧二年分

置銀山縣月山縣龍水縣唐武德元年改郡爲資州  
天寶改資陽郡乾元復爲資州咸通二年徙州治內  
江七年還來治屬建南道宋爲資州資陽郡屬潼川  
路乾德五年省銀山月山宣和二年省龍水尋復置  
淳祐三年省龍水元省盤石明洪武四年改資縣屬  
成都府 國朝雍正五年改州直隸永寧道○州北  
一里盤石故城東南三十八里銀山故城西五十里  
月山故城西南八十里龍水故城

沱江又西經三堆山

三峯挿漢臺閣凭空亦縣之勝也名勝記曰中江源  
出汶山自灌口分支經懷口入簡縣歷資江而下經  
三堆山西折而東至縣復東折而南至排木鎮又東  
折而西至黃市市距三堆十五里一水周環九十餘  
里而縣當其中故曰中江江去城不百武與城內桂  
湖相通以盈縮清濁知之也器物譜曰三堆山居人  
掘得銅牌一面上有字云塵世不我留身寄白雲浮  
若問真遊處三山與十洲

沱江又南經華萼山

嚴鐫匯澗有斐四字唐范崇凱書勝覽謂崇凱讀書於此崇凱字金卿李白贈詩云范宰不買名絃歌對前楹也明皇命作花萼樓賦賦成稱爲天下第一弟元凱亦有文名其墓在山上

沱江又東經內江縣城西北又東北折而南又折而東又折而南受高橋溪又東受清流溪

內江縣故資中地也晉永嘉中沒于獠周天和二年置漢安成尋改中江縣屬資陽郡隋大業十二年分置牛鞞縣天寶元年改牛鞞爲清溪咸通六年移資



州來治七年還治盤石宋乾德五年省清溪紹興末  
置安夷軍尋廢元省內江明復置屬成都府 國朝  
雍正五年改屬資州○縣東北八十里有清溪故城  
沱江又東南經石筍山

名勝記曰石筍山三石如筍下圓上銳聳峙漢表清  
影沉江則長虹滿地新月初上則明燭當天形家謂  
石筍爲地軸三堆爲天關

沱江又南經豸石山

山踞江如豸其下爲牛腹渡

沱江又南受鼇溪鼇溪源出縣東馬鞍山經安息壩過永鎮橋東南經洗經橋老觀嘴流杯池至駝灘入江鼇溪亦名觀音河

沱江又南經富順縣城東折而西而南又折而西南流爲金川

江水至富順神龜山下紮紆向西而去謂之洛源源出洛通山也謂之金川綿洛湖三水會於金堂峽也謂之釜川東西緣繞縣治若釜形也中流有石堆高出水面分有兩層前三後七謂之三臺七曜石志曰

源自灌口離堆分流過濠陽下廣漢合金雁水奔流  
三皇潭經簡州資中出內江龍門鎮入富順界南經  
觀音灘金子灘神井戰灘至縣城東門紆縈向西經  
神龜山聖燈山轉東爲青山峽石灰溪又東爲趙化  
鎮過虎頭城又東爲巖槽經懷德鎮大磨東入瀘州  
會大江段玉裁中水考曰此水隨地異名在新都曰  
新都江華陽國志牛鞞縣受新都江是也在金堂簡  
州曰牛鞞江華陽國志資中縣受牛鞞江水經注洛  
水又逕犍爲牛鞞縣爲牛鞞水是也在資州內江曰

資江沈約宋書資江爲中水涪江爲內水是也班氏  
湔水入江常氏酈氏洛水入江說各互異以下流互  
受通稱也或謂之沱江則以岷江自灌縣分流而達  
于漢州之洛合於尚書東別爲沱也或稱沱犀河犀  
牛河則援李冰故事名之也

富順縣故江陽地也周武帝分置洛源郡富世縣隋  
廢郡以縣屬瀘州唐武德四年分置來鳳縣九年省  
貞觀二十二年改富義縣宋乾德四年改監太平興  
國元年分置富順縣屬潼川路熙寧九年縣廢咸淳

元年徙監治虎頭山元初還故治至元十二年改富  
順監二十年改州屬敘州路明改縣

沱江又西匯爲湖

湖濶六七里荷菱菰蒲蔚然蒼翠菱蓼花開紅綠相  
映當夜氣澄清時明月波光水天一色上有超然臺  
吹玉亭愛蓮亭舊時湖身甚濶直包馬腦凌雲二山  
之外今爲居人墾田東而狹之纔一里有餘耳湖隄  
之口爲石龜山石壁峭立相傳山有巨龜出則千百  
小龜從之

沱江又西經凌雲山

山在城西一里峯巒巖業山頂落日獨遲夕照可愛  
產青紫石可爲硯大江前橫一峯突兀爲士人登臨  
勝處

沱江又西受榮水

沱江又折而東南流經青山峽

兩岸諸山蜿蜒盤曲至峽口高峯巖崿兀起對峙如  
門仰天一綫浴水中流濼洄三折水色碧漲兩岸巨  
石蹲踞或起或伏盛夏水漲觸石怒險江中有海螺

堆巨石峙立若海螺狀

沱江又南經趙化鎮受銀蛇溪銀蛇溪源出南溪縣山谷經跳磴林洞而來入沱

江畔三石低昂揖遜謂之君子石鎮下有潭首戴巨石如龍謂之龍王潭銀蛇溪口石盤水泛相盪成泡影如蛇謂之石王溪

沱江又南經虎頭山受之溪之溪源出石硯山東又南流入沱

虎頭山巨石岬巒蹲於江邊有洞吞吐雲氣如虎下

有雉堞宋淳熙中徙富順縣城於此也對岸錫山錫水所出聳峙孤高如金蟾偃仰又名金蟾山宋嘉定中邑人吳永清建亭其上匾曰臨清

沱江又東南經懷德鎮受石鹿溪

名勝記曰支江出南溪石柱山石龍支流東經富順椽子槽至懷德鎮入雒

沱江又東南受石溪石溪源出石燕山西經隆昌縣城南受金鵝溪金鵝溪源出迴龍山金鵝洞遶城東南穿隆橋而西受黑溪桂溪又西受高洞水南入石溪石溪



又西經水峽口入沱

隆昌縣故富順地之隆昌驛也明隆慶元年分置屬敘州府

沱江又東受耶水

沱江又東南經方山

方山亦名雲峯山亦名回峯山頂有巔池周圍一里龍潛其中華陽國志曰漢光武微時過江陽有一子望氣者言江陽有貴兒氣王莽求之縣人殺之光武怒爲子立祠方山謫江陽人不使冠帶者數世此妄

說也光武未嘗入蜀

沱江又東經瀘州城北入江

長年云金堂縣毛家澗大河灣趙家渡共六十里蟠  
龍寺泥壩沱金龍船三黃灘走馬灘蝦蟆灘蒲天星  
懷州共五十里吳家壩來風洞走馬河石橋井簡州  
共九十里犁轆灘余家壩臨江寺太子寺金山篆困  
龍渡楊花河共一百五十里洪巖子半面灘魚樁灘  
資陽縣共五十里猴子洞壘井溝方家壩疲石灘南  
經驛共六十里蘓家灣求溪河土地灘拖船溝草古

坪棹子角白鶴寺陡里子牛碾沱新塲灘雞冠峽文  
家塲五里灘倒掛金鈎資州共一百六十里猪捲門  
窄巷子唐明渡桐子濠橫梁子蕪家灣殺魚灘木溪  
口過路灘雲山鎮碑亭灣史家灘願水寺龍灣灘內  
江縣共一百四十里荳腐石過路灘白鎮溪柏木鎮  
三道濠洛溪子洛塲子雞公灘雞膊灘黃石井白馬  
廟鍾家塲金銀灘雷打灘神井灘上巖漕野猫溪札  
營灘虎跳灘富順縣共二百二十里大佛寺纜船溝  
河口灘棹子角小堰灘大堰灘半面山黃角浩牛皮

灘酸梅灘亂石窩乾礁窩下巖槽青石峽石灰溪白  
馬灘麻柳灘趙家鎮馬腿灘雪到灘虎頭城撒金灘  
懷德鎮白塔礪烏木灘海明寺余家壩紅巖子諶和  
鎮共一百六十里畢幾灘大磨子海橋寺馬踏灘楊  
公灘雪山寺通灘荔枝灘流灘子洛灘壺矢三灘鯉  
魚洞磨漿巖立巖灘葛花灘公婆灘黃泥灘瀘州共  
一百二十里

綿水

綿水源出茂州南雪山之麓東經大壩塞綠澗東行而

名山  
卷之十一  
三  
出山

漢書曰綿水出綿竹縣紫巖山南至新都入雒水經注曰綿水西出綿竹縣又與湔水合亦謂之郭江又言是涪水然此二水俱與雒會矣明史曰安縣雒水關西有綿堰堡綿水發源處按涪水不入綿雒水經誤也水經又謂涪水枝津至成都府入江益失其實矣

綿水東經綿竹縣北紫巖山爲綿堰口

地道記曰綿竹有紫巖山綿水之所出唐書縣有樂

安山卽紫巖山亦名綿竹山爲七十二福地之一山  
南相連有浮中山四面懸絕亦名秦中山益州記曰  
南陰平縣有浮中山每芳春遊人登賞謂之迎春崗  
綿竹縣漢置屬廣漢郡後爲廣漢郡尉中平五年劉  
焉徙益州來治尋復故晉太始二年改屬新都郡隆  
安二年以秦州流民分置晉熙郡晉熙縣南武都縣  
宋以綿竹改屬南陰平郡齊永元初廢晉熙郡以晉  
熙縣屬南新巴郡梁復郡周廢長陽武都而省晉熙  
入陽泉隋開皇三年廢郡徙綿竹治于晉熙故城而

縣爲晉熙十一年改雒縣爲綿竹晉熙爲孝水大業  
三年復改孝水爲綿竹屬蜀郡唐武德三年改屬豫  
州貞觀二年州廢屬漢州元至元十二年省縣入漢  
州二十九年復置明改屬成都府 國朝雍正五年  
改屬綿州○縣東五十里綿竹故城北十五里武都  
故城○縣人張南軒先生栻聞道甚早與朱子爲友  
縣北十五里有南軒讀書臺南二十里有敬夫室  
綿水又東受玉妃溪玉妃溪源出武都山南入綿

蜀記曰武都山精化爲女子爲蜀王妃未幾物故乃

發卒至武都山擔土爲冢名勝記曰妃與五丁同生  
父母棄之溪後聞呱呱聲就視乃一女五男五丁同生  
妃男卽五丁故常璩云武都山精化爲美女按此亦  
荒謬之談

綿水又南經綿陽鎮

俗名黃許鎮實綿州西界

綿水又南經德陽縣城東

德陽縣故綿竹地也蜀漢分置陽泉縣屬廣漢郡晉  
安帝分置長陽縣屬晉熙郡又以陰平流民倚置南

蜀水經

卷之十一

七



陰平郡陰平縣周省葭陽入晉熙陰平入雒南陰平郡廢唐武德三年分雒置德陽縣屬益州垂拱二年改屬漢州元至元二十年改縣爲德州十三年復故屬成都路 國朝雍正五年改屬綿州○舊傳許真君遜洪州人晉太康中爲德陽縣令有仙術歲歉點石化金以濟民今縣治有煉丹井煉丹臺遺跡見按漢郡國志德陽縣注有劍閣三十里至陰則德陽非今縣而真君宰旌陽非德陽也德陽自漢以來無改旌陽者晉太康地志旌陽縣屬南郡德陽縣屬廣

漢郡又隋書竟陵郡樂鄉縣注梁置旌陽縣

城內有孝子坊爲姜詩建也後漢書廣漢姜詩妻同郡龐盛之女詩事母至孝妻奉順尤篤母好飲江水水去舍六七里妻常泝流而汲後值風不時得還母涓詩責而遣之妻乃寄止隣舍晝夜紡績而珍饈使隣母以意自遣其姑如是者久之姑怪問隣母隣母具對姑感慚呼還恩養愈謹其子後因遠汲溺死妻恐姑哀傷不敢言而托以行學不在姑嗜魚鱸又不能獨食夫婦常力作供餼呼隣母共之舍側忽有涌

泉味如江水每旦輒出雙鯉魚常以供二母之膳赤  
眉散賊經詩里弛兵而過曰驚大孝必觸鬼神時歲  
荒賊乃遺詩酒肉受而埋之永平三年察孝廉拜爲  
郎中尋除江陽令卒於官華陽國志曰孝子江陽符  
長姜詩字士遊妻龐行雜人汎鄉有姜詩田地宅水  
經注曰詩有田濱江澤鹵泉流所溉盡爲沃野可謂  
孝悌發於方寸徽美著於無窮者也鄭少微記曰縣  
西北四十里有鎮詩故宅在焉號姜詩鎮宋治平中  
知綿竹縣事郭震謂士遊行甚高宜諱其名號孝泉

鎮舍側湧泉至今不絕按姜詩鎮卽古之汎鄉水經注以爲洛縣沈鄉汎則汎之訛也

綿水又東南逕連山東受土溪

土溪源出湧泉大小二源大者在高原形如仰釜周迴千餘丈水如沸嘗見有異物如牛浮水上見人卽隱小者在平地數脉湧出如玉田沙錄異記曰湧泉水脉五六自山下湧出積成大池二三百步可激碓

碓

線水又東南爲綿陽河又東經銅盤山與雒水會又東

經趙家渡入沱

雒水

雒水亦名浚江源出什邡縣北洛通山

漢書曰雒縣有章山雒水所出南至新都入瀟水經注曰洛水出洛縣章山亦言出梓潼縣柏山又南逕洛縣故城南又南逕宜都縣與綿水合又與瀟水合亦謂之鄆江又逕犍爲牛鞞縣爲牛鞞水又東逕資中縣又逕漢安縣謂之綿水又至江陽方山下入江謂之綿水口亦曰中水寰宇記曰浚江在縣東北八

十里源出洛通山山在縣西北四十里

什邡縣漢置屬廣漢郡高帝五年封雍齒爲什邡侯  
莽曰美信漢復故晉太始二年改屬新都郡李雄叛  
蜀遣李壽盡掠漢川五千家寓南陽里太康元年置  
南陽郡後魏廢郡周閔帝改方亭武帝省入雒唐武  
德三年復置什邡屬益州垂拱二年改屬漢州宋改  
屬成都路

雒水又東經高境關南分支南流爲白魚河

江水出高境關大郎廟前始大放分流十水縣名卽

從起也高境關外卽章洛山物產萃焉華陽國志謂  
大姓楊氏之所居山有風洞卽之氣冷有火洞卽之  
氣熱後巖大冢云是李冰葬所

雒水又東南經火燒堰

雒水又東經石亭舖爲石亭江

江畔有石亭因以名江晉永康二年趙廞叛李特李  
流軍綿竹廞使費遠斷北道屯綿竹之石亭樊真公  
曰學宮有石版陰陽書似爲石亭賦者因石阜以庭  
宇跨飲江之鼇鼉岌飛簷與鐵柱挿清江之齋淪眩

古潭之百尺涵萬象于瑤崑耿月魄以終夜湛大容  
之方春信蒼蒼之非色極深遠而自然疑貝闕與珠  
宮有玉函之老人

雒水又東南受射水射水源出綿竹縣西三溪山經射  
箭臺爲射水又東南受白水又東南受馬尾水馬尾水  
源出縣北紫巖山天池壩東經馬尾口又東南經綿竹  
縣城東又東南入射射水又東南入雒

隋蜀王秀提兵至此士馬苦渴王以三矢祝天射山  
之西北麓三泉湧出因名射箭臺



雒水又東南經漢州北受石魚河東經鳳凰嘴入雒

石魚河卽雒水支流自高境關分支

雒水又東南受雁江雁江源出彭縣五峯山東經壩口鎮南又東逕彭門山下出三郎鎮分支南流爲馬木河其北流爲鴨子河東經馬脚井又東經鎮口林又東南經漢州城北受沉犀江又東經茅包堰入雒

跨惡江者爲金雁橋漢張任與劉璋子循守雒城任勒兵出雁橋戰敗圖經曰洛水在城東半里又名沉犀水水性剛立淬刀任豫益州記曰雁橋東君平賣

卜土臺局高數丈又曰廣漢郡北一里半有犀橋郎  
白魚水也

雒水又東南與綿水會

熊敦朴富順縣修隄記曰洛通者章山也洛水所出  
濫觴抗葦幾滿汨而抵什加自什加下流逕新都而  
與合者爲綿水流逕綿竹而與合者爲湔水再歷廣  
漢資簡中江以遞洛源再合而會金堂石亭絳水雁  
水中水以入金川而洛始滂瀆東注大江焉○志曰  
石亭江源發洛通山流八十里至高境關分一小支

南流四十里經縣城東北又十里入漢州境又四十里經州城東爲沅犀江其正派東南流四十里入漢州境又六十里合沅犀江又十里入金堂縣境又十七里合綿陽河又南二十四里至焦山坡合前中二江

榮水

榮水有二源西源出榮隱山爲榮川東源出梧桐溝爲東川左右繞榮縣城爲雙溪

陸游橫溪閣詞所謂一自西來其水濁一自東來其

水清也

榮縣故南安江陽地也宋義熙十年置治官縣齊永  
元三年廢治官置南安縣周置公井鎮隋開皇十年  
廢南安置大牢鎮十三年改大牢縣屬資州大業十  
一年分置資官縣屬犍爲郡唐武德元年分置榮州  
改公井鎮爲縣六年徙州治大牢貞觀元年分置旭  
川縣永徽二年徙州治旭川景龍二年省羅水榮川  
湖連三縣入大牢天寶改州爲和義郡大牢爲應靈  
縣乾元復爲榮州屬劍南道宋爲榮州和義郡屬潼

川路治平四年改旭州爲榮德熙寧四年廢公井紹熙中改州爲紹興府寶祐後廢府爲州省榮德開禧元年封皇子曠爲榮王元廢資官應靈入州屬嘉定路明洪武九年改州爲縣○縣東黎山縣西榮隱山縣東北榮德山所謂三榮也

榮水又東受馬落溪馬落溪源出馬落洞東經貢井入榮

李芝濟東橋記曰榮溪山宜賓逶迤蟠折越巉巖走巨石瀾澍滄湔而南下會威遠之龍會水以達兩井

之衝

榮水又東會獻寶溪獻寶溪有二源西源出羅泉山東源出兩母山合流而東受秦川秦川源出佛頂山南受獻寶溪又東南經火燄山爲硫磺川又南經威遠縣城東受十江水又西南爲石牛河又爲龍會河又南經瑪瑙山入榮

火燄山有火穴平時穴中但有冷氣以家火導之則火出居民卽穴爲窰磚瓦石灰不柴薪而成也溪水沸如湯山上草木茂密無異

威遠縣故資中地也隨開皇二年分置威遠成十一年改縣大業十二年分置和義縣俱屬資陽郡唐武德元年改屬榮州貞觀元年分置婆日縣至如縣八年廢宋乾德五年省和義元至元中省威遠尋復置明洪武四年省九年復置屬嘉定府 國朝康熙六年省雍正六年復置

榮水又東經自流井

井在富義廠榮溪之濱相傳舊井天成不假塹鑿其後巖崩井塞開掘異處乃人力爲之也華陽國志江

陽縣有富義鹽井蜀都賦注蜀郡臨邛縣江陽郡江陽縣漢安縣皆有鹽井元和志富義鹽井在西南五十步月出鹽三千六百六十石劍南鹽井唯此最大其餘又有鹽井七所寰宇記井溪二百五十尺鑿石以達鹽泉其餘又管大小井六蓋唐鹽井在縣治內宋立富義監元明井竭今距城百里之自流井最盛王家井次之亦地脉流徙之故

榮水又東受洪溪洪溪源出大洞小洞東北經洪灘入榮



榮水又東受小溪小溪源出牛口山東南經黑鉛灘爲長灘河又東南經響水洞又東南經仙灘入榮

牛口山形勢自威遠衍迤而來起伏數百里特起峯巒巖石稜立溪水經其下交絡縈紆爲縣北名勝

榮水又東受鐵錢溪

溪在鄧井關前關設縣丞一員

榮水又東受入沱

俗以此爲遜水因縣有竹王祠也是又嘉定竹公溪之訛矣通志曰榮溪源出仁壽縣經榮縣西南合東

川溝至濟東橋繞公井北流會中溪河東至雙河口  
會龍會河南過自流井牛心灘百節灘出峽口東由  
流爲洪灘仙灘沿灘又東經老鴉關鄧井關至鎮溪  
入雒水

耶水

耶水源出安岳縣南香雲山響水潭

耶水亦名龍溪亦名岳陽溪上下皆石水觸有聲如  
金鼓其洩如倒其澄如止

耶水東受雙溪

勝覽曰雙溪在郡西七里與岳陽溪合流而東

耶水又東經安岳縣城南

宋天聖中郡守彭乘鑿石爲曲水每歲修禊事於此  
相與流觴賦詩謂之翰林灘溪中有流盃池一名希  
夷池溪底皆平石方輿勝覽曰彭乘華陽人求便養  
親得知普州舊制蜀人不得官蜀特恩自乘始

安岳縣故資中牛鞞德陽地也周建德四年分置普  
州安岳縣永康縣隋開皇十八年改永康爲隆康大  
業廢州改屬資陽郡唐武德二年復置普州先天二

年改隆康爲普康天寶改州爲安岳郡乾元復爲普  
州屬劍南道宋爲普州安岳郡乾德五年廢崇龜普  
慈二縣熙寧五年省普康入安岳寶祐以後州縣俱  
廢元末復置安岳又置石羊縣屬遂寧州明洪武四  
年復置普州九年廢州省石羊入安岳屬潼川府  
國朝順治十五年省入蓬溪康熙五年省入遂寧十  
年省入樂至雍正六年復置○縣治枕鐵山唐獨孤  
及詩云雁陳起秋雲雞聲滿林屋客思不可樂鐵峯  
駐雕轂者此也山有神是隋都統姚景徹平普昌瀘

三州夷卒葬韓朋鎮石城山○縣南五十里有隆康  
故城東一百里有石羊故城

耶水又南經大足縣東

大足縣故巴川地也唐乾元元年分置大足縣屬昌  
州光啟元年徙州來治宋爲昌州昌元郡領大足昌  
元永川三縣元州縣俱廢入合州明洪武四年復置  
縣屬重慶府 國朝省入榮昌雍正六年復置○寰  
宇記曰縣以大足川名○冷齊夜語曰昔有人謫官  
都下踰年得昌守者已而求易便地彭淵才聞而止

之曰昌佳郡也守問故曰海棠患無香獨昌地海棠  
香非佳郡而何故號海棠香國土人云地宜此花易  
植易蕃郡治香霏室一老樹重趺壘芳每花二十餘  
瓣花氣穠郁餘不能及也

耶水又南受瀨波溪瀨波溪源出瀨婆山東南入耶

寰宇記曰山在昌元縣南九十里四面懸絕唐大曆  
四年在山下置行州

耶水又南經榮昌縣城西

榮昌縣故瀘普渝合資榮六州境也唐乾元元年置

昌州昌元縣靜南縣大歷六年廢州十年復置屬劍  
南道光啓元年徙州治大足周顯德初昌元爲寇所  
焚徙治羅市鎮宋天禧中徙治寶蓋鎮尋省靜南入  
州屬潼川路元廢昌元明洪武四年置榮昌縣屬重  
慶府○碑目曰古文孝經在北山凡二十二章與今  
文十八章小異今文先出于漢初而古文與尙書同  
出孔子壞宅今文已盛古文不列學宮惟孔安國馬  
融爲之傳及明皇注今文十八章孝經古文益微矣  
司馬光范祖禹皆曾校進光謂始藏文時去古未遠

其書最真祖禹又爲之說亦云古文庶得其正

耶水又南經青江灘受白雲溪

耶水至此磯石塞斷舟楫阻絕

耶水又南經瀘州北玉蟾山受九曲溪九曲溪源出隆昌縣東合內江榮昌諸山溪之水爲小溪東南經瀘州嘉明鎮又東南入耶

玉蟾山有楊升菴大書玉蟾二字石坊

耶水又南入沱

通志曰岳陽溪自安岳縣石羊場南流十五里至大



足縣東郭長橋又三十里至流虹橋又二十里爲孔  
河又二十八里至榮昌觀音灘又西南流二里至榮  
昌縣城西出恩濟橋又三十五里至青江灘入濶州  
又四十里至福集場繞玉蟾山下入資江按岳陽溪  
卽古之耶水元和志謂昌元縣東至州一百二十里  
東接瀨波西臨耶水是也志又以爲思晏江然思晏  
縣屬晏州在大江南岸與文境內其誤明甚